



Kwa Ajili ya Maisha Haya na Yale Yajayo

Kufafanusha maneno yako kwatia nuru; na kumfahamisha mjinga.—
Zaburi 119:130.

Kwa akili na roho, na kadhalika kwa mwili ni sheria ya Mungu kuwa uwezo upatikane kwa jitihada. Ni zoezi linaloendelea. Kwa kupatana na sheria hii, Mungu ametoa katika Neno Lake njia za kukuza akili na uhusiano wa kiroho.

Biblia inazo kanuni zote ambazo watu wanatakiwa kuzielewa ili kufanywa kufaa kwa maisha haya au yale yajayo. Na kanuni hizi zinaweza kueleweka kwa watu wote...

Hata hivyo uweza wa Biblia ni mkuu zaidi katika ukuaji wa asili ya kiroho. Mwanadamu, aliyeumbwa ili kuwa na ushirika na Mungu, anaweza tu kupata maisha yake halisi na maendeleo katika uhusiano huo. Akiwa ameumbwa kupata furaha yake kuu katika Mungu, hawezi kupata mahali pengine kitu cha kutuliza kiu za moyo, kuzima njaa na kiu ya nafsi. Yule ambaye husoma Neno la Mungu kwa dhati na roho ya kufundishika, akitaka kuzielewa kweli zake, atakutanishwa na Mwanzilishi wake; na kutegemeana na uchaguzi wake, hakuna kikomo kwa uwezekano wa ukuaji wake.

Katika mapana yake ya muundo na maudhui Biblia ina kitu fulani cha kufurahisha kila akili na kuupendeza kila moyo. Katika kurasa zake kuna historia ya mambo ya kale kabisa, wasifu wa kweli kabisa maishani; kanuni za serikali za kuongoza taifa, kwa udhibiti wa mambo ya nyumbani—kanuni ambazo hekima ya kibinadamu haijazifikia. Ina falsafa ya msingi sana, ushairi mtamu mno na bora sana, unaogusa sana, na kutia huruma. Maandishi ya Biblia yana thamani ya juu mno isiyopimika kwa viwango vya wanadamu; hata wakati yanapotazamwa hivyo; lakini ni ya upeo mpana usio na ukomo, ya thamani kuu isiyo na ukomo yanapoangaliwa kulingana na fikra kuu ya msingi. Yakiangaliwa kwa mtazamo huo, kila mada ina umuhimu mpya. Katika kweli zilizoelezwa kwa lugha rahisi mna kanuni zilizo juu kama zilivyo mbingu na za milele.

Dhima kuu ya Biblia, dhima ambayo kwayo kila dhima nyingineyo katika kitabu kizima imejengwa, ni mpango wa wokovu, urejeshwaji wa sura ya Mungu katika nafsi ya mwanadamu. Kuanzia dokezo la kwanza la tumaini katika sentensi iliyotamkwa Edeni hadi ahadi ya mwisho tukufu ya Ufunuo, "Nao watamwona uso wake na jina lake litakuwa katika vipaji vya nyuso zao" (Ufunuo 22:4) mzigo wa kila kitabu na kila kifungu cha maneno ya Biblia ni ufunuo wa dhima hii ya ajabu—kuinuliwa kwa binadamu, - uwezo wa Mungu, "utupao kushinda kwa Bwana wetu Yesu Kristo" 1 Wakorintho 15:57.

Yule anayeelewa kikamilifu wazo hili mbele yake anao uwanja mpana mno wa kujifunza. Ana ufunguo ambao utamfungulia nyumba yote ya hazina ya neno la Mungu (Elimu ya Kweli, uk. 96–98).